

饑民搶掠米船

太平府貧民羣集搶掠郡河米船其人數有千數百提署中協張朋亮帶勇前往鎮壓

慶邸病有轉機

慶親王病勢未輕減已奉 特恩賞假數月無須續行請假係照從前榮文忠之例

電告俄兵出境

吉黑二省俄兵均退出境已據程德全達桂電告北京矣

求振之民聚衆

餘姚縣沙民因饑求振聚衆滋鬧營官帶兵彈壓縣令以救亂必須辦振辦振必須撥款上稟大吏矣

衍聖公陛見謝恩

孔子升爲大祀聖裔衍聖公理宜陛見恭謝

初五日召見

上海道致督撫電請查無錫圍米

南京督憲蘇州撫憲鈞鑒辰訪查無錫有人圍米百八十萬餘擔近日各處米價翔貴似此屯集居奇亟應嚴究以紓民困務乞密飭嚴查稟辦 激支

有泰被參案定讞

駐藏幫辦大臣張蔭棠查明有泰被參各款即行電奏奉 旨有泰發往軍臺効力游擊劉文口交川督永遠監禁所得贓款一併追繳

澤公請布外官制

政治館原議外官制尙未頒布蓋因淆惑於各省督撫之異論茲澤公已專摺奏請宜照原議頒布云